

四庫全書

經部

欽定四庫全書

六家詩名物疏卷十八

明 馮復京 撰

國風衛三

河廣篇

葦

詳見召南葭

埤雅云葦即今之蘆其管中簫

刀

說文作𦨇𦨇小船也字異音同○釋名云三百斛曰𦨇

朔貂也貂短也江南所名短而廣安不傾危者也

伯兮篇

伯

傳云州伯疏謂州里之伯若牧下州伯則非衛人所得爲內則云州史獻諸州伯州伯命藏諸州府彼州伯對閭史閭府亦謂州里之伯也○周禮五黨爲州州長各掌其州之教治政令之灋

受

釋名云戈殊也長丈二尺而無刃有所撞挫于車上使殊離也○說文云戈以杖殊人也禮戈以積竹八觚長丈二尺建于兵車旅賁以先驅也○周禮司戈盾祭祀授旅賁戈○考工記云車六等之數戈長尋有四尺崇于人四尺謂之四等又云廬人爲廬器轂兵同強舉圍欲細細則校凡爲戈五分其長以其一爲之被而圍之參分其圍去一以爲晉圍五分其晉圍去一以爲首圍注改勾言轂容戈無刃舉手所操校疾也被把中也圍

之圖之也凡矜八觚晉讀如楮矜所捷也首戈上鐔也
○司馬法云長兵以衛短兵以守太長則犯太短則不
及太輕則閱閱易則亂太犯則不濟故初列即戟間馬
次列戈矛間焉又云弓矢圍戈矛守戈戟助○禮書云
戈所操者二尺四寸圍其所操則非所操者有袞矣鄭
氏謂矜八觚是也細而能數則非竹不可許慎謂積竹
爲之是也詩云伯也執殳爲王前驅又曰彼候人兮荷
戈與袞袞亦殳也蓋殳雖建于車及王行則州伯執而前

賓客往來則候人荷而趨

膏

讀詩記云膏所以膏首魯遣展喜以膏沐勞齊師則膏非專婦人用也

沐

讀詩記云沐蓋潘也左氏傳遺之潘沐杜預注云潘米汁可以沐頭○內則云面垢燂潘請澣

諼草

說文云憲令人忘憂草也又作蕨及萱○本草云萱草
一名鹿蔥花名宜男○圖經云萱味甘而無毒主安五
藏利心志令人好歡樂無憂輕身明目五月採花八月
採根用今人多採其嫩苗及花附作蔬云利胃膈甚佳
○古今注云欲忘人之憂則贈以丹棘一名忘憂草○
博物志神農經曰中藥養性謂合歡蠲忿萱草忘憂○
風土記云宜男姪婦佩之必生男○述異記云萱草一
名紫萱吳中書生呼療愁花○雅翼云此草又名鹿蔥

晏元獻公謂鹿蔥花中有鹿班文與萱大同小異開花亦不竝時○徐勉萱賦云信茲華之獨茂挺金質于炎辰既耀色以祛痼亦含香而可珍同芰荷于蘭暑及蟬露乎首旻其葉四垂其附六出亦曰宜男加名斯吉華而不艷雅而不質

案朱傳云諼草合歡誤也古今注云合歡樹似梧桐與萱全別或者朱子因諼草連引合歡作一句讀而不以合歡解諼草乎

草

說文云艸百卉也從二屮又云草斗櫟實也一曰象斗
子徐鉉曰今俗以此爲艸木之艸別作阜字爲黑色之
阜案櫟實可以染帛爲黑色故曰草通用爲草棧字○
爾雅云卉草疏別二名又云薈芦萑華榮疏別艸木榮
華之異名又云荻根據橐含木謂之華艸謂之榮不榮
而實謂之秀秀而不實謂之英○方言云蘇芥艸也江
淮南楚之間曰蘇自關而西或曰艸或曰芥薈芥艸也

東越揚州之間曰艸南楚曰莽○大戴禮云孟春水泮
百艸權輿○周書云霜降之日艸木黃落○淮南子云
醴泉生皇章皇章生庶艸

背

傳云背北堂疏云背者向北之義故知在北士昏禮云
婦洗在北堂有司徹云主婦北堂房室所居之地總謂
之堂房半以北爲北堂房半以南爲南堂○廬陵李氏
云房屋相連爲之房無北壁故得北堂之名○朱子云

北堂蓋古植花木之處○禮書云北堂在房之北

有狐篇

厲

傳云厲深可厲之旁○韓詩云至心曰厲○爾雅云以衣涉水爲厲繇膝以下爲揭繇膝以上爲涉繇帶以下爲厲○韻會注云岸高危處曰厲

木瓜篇

木瓜

爾雅云楸木瓜注實如小瓜酢可食○陶隱居云山陰
蘭亭尤多最療轉筋○蜀本注云其樹枝狀如柰花作
房生子火乾甚香○圖經云木狀如柰花生春末深紅
色實大者如瓜小者如拳宣州人種蒔尤謹遍滿山谷
始實成則鍍紙花薄其上夜露日晡漸而變紅花又如
生本州以充土貢又有一種檳櫨木葉花實酷類木瓜
欲辨之看蒂間別有重蒂如乳者是木瓜也○雷公云
真木瓜皮白微赤黃香酸甘不澀調榮衛助穀氣向裏

子頭尖一面方勿誤用和圓子蔓子土伏子○考工記
弓人取幹之道木瓜次橘○廣志云木瓜子可藏枝爲
杖號一尺百二十節○水經注魚復縣多木瓜樹子大
如鰕

瓊

疏瓊是玉之美名○說文瓊赤玉也

琚

纂要云琚瑀所以納間在玉之間今白珠也○羅中行

云琚處佩之中所以貫蠙珠而上繫于珩下維璜衝牙者也○朱氏云琚如圭而正方在珩璜之中瑀如大珠在中央之中○錢氏云佩玉之雙璜上係于珩又有組以左右交牽之使得因珩之抑揚以自相衝擊于兩組相交之處以物居其間交納而拘捍之故謂之琚或以大珠或雜用瑀石詩言琚言瓊則佩之美者也

案朱氏以兩旁之中爲琚羅錢二氏以中央之中爲琚其說不同

木桃木李

埤雅云江左故老視其實如小瓜而有鼻食之津潤不
木者謂之木瓜圓而小于木瓜食之酸澀而木者謂之
木桃木李大如木桃似木瓜而無鼻其品又小木桃亦
或謂之木梨梨益聲之誤也鼻即瓜之脫華處里俗呼
之爲咪其著華處乃臍也案魚龍河圖曰瓜有兩蒂兩
鼻者殺人則鼻與蒂異矣木瓜性脆木李性堅今人以
蜂飴漬之者取木瓜煎之者取木李○徐氏云瓜有瓜

桃有羊桃李有雀李此皆枝蔓也故言木瓜木桃木李以別之

案木桃李依陸說似即木瓜之類非即桃李也述異記云桃之大者謂之木桃又即桃類

瑶

說文云瑶玉之美者

玖

傳云瓊玖玉名○丘中有麻傳云玖石次玉者○說文

云石之次玉黑色者

國風王一

王

互見車攻篇東

鄭譜云王者周東都王城畿內方六百里之地封域在
禹貢豫州太華外方之間北得河陽漸冀州之南始武
王作邑於鎬京謂之宗周是爲西都成王在豐欲宅洛
邑使召公先相宅既成謂之王城是爲東都今河南是
也召公既相宅周公往營成周今洛陽是也成王居洛

邑遷殷頑民於成周復還處西都平王以亂故徙居東
都王城○地里志周地今之河南洛陽穀城平陰偃師
鞏緱氏是其分也晉周公營洛邑以爲在于土中諸侯
蕃屏四方故立京師至平王東居洛邑襄王以河內賜
晉文公又爲諸侯所侵故其分地小○括地志平王以
下十二王皆都王城至敬王乃遷都成周赧王又居王
城○呂東萊云成周乃東都摠名河南成周之王城也
洛陽成周之下都也平王東遷之後所謂西周者豐鎬

也東周者東都也威烈王之後所謂西周者河南也東周者洛陽也○朱仲晦云周地今河南府及懷孟等州是

案河南縣今廢在河南河南府城唐苑內城西有邾鄆陌即定鼎之地洛陽故城在河南府城東洛水北懷州今爲懷慶府孟縣宋之孟州也

黍離篇

黍

說文云禾屬而黏者也以大暑而種故謂之黍從禾雨
省聲孔子曰黍可爲酒禾入水也○爾雅云衆秣疏衆
一名秣謂黏粟也與穀相似北人用之釀酒其莖稈似
禾而麤大○本草云黍米味甘溫無毒主益氣補中陶
隱居云其苗如蘆而異於粟粒亦大粟而多是秣今人
又呼秣粟爲黍非也北人作黍飯方藥釀黍米酒則皆
用秣也唐本注云黍有數種亦不似蘆似粟而非粟圖
經云有二種米粘者爲秣可以釀酒不粘者爲黍可食

如稻之有粳糯○夏小正云五月初昏大火中大火者
心星也心中種黍菽糜時也○周書云凡禾黍居南方
○月令仲夏農乃祭黍是月也天子乃以雛嘗黍疏云
仲夏黍新熟今蟬鳴黍是也又云孟秋農乃登穀注黍
稷之屬於是始熟曲禮云黍曰鄉合內則云羊宜黍豕
宜稷○春秋說題辭云精移火轉生黍黍者緒也故其
立字禾入米爲黍酒以防老○家語孔子曰黍者五穀
之長祭先王以爲上盛○呂氏春秋云得時之黍芒莖

而微下穗芒以長搏米而薄糠舂之易而食之不噉而
香如此者不飽先時者大本而華莖殺而不遂葉藁短
穗後時者小莖而麻長短穗而厚糠小米鉗而不香○
汜勝之書云黍者暑也種必待暑先夏至二十日此時
有雨強土可種黍黍欲疏于禾○白虎通云清明風至
則黍稷滋閭闔風至則種宿麥黍○雅翼云黍之秀特
舒散故說者以其象火爲南方之穀大體似稷故古人
并言黍稷有赤黍白黍其類有黏不黏黏者別名秫月

令造酒命大酋秫稻必齊蓋以此秫與稻之糯爲酒北人謂秫爲黃米亦謂之黃糯釀酒比糯稻差劣○梁寅云或粘或不粘或高而實黑或低而實黃皆謂之黍

稷

爾雅云粱稷○左傳云粱食不鑿注黍稷曰粱○月令云孟春行冬令首種不入注舊說首種謂稷玉藻云子卯稷食而菜羹又云沐稷而醑粱○本草云稷米味甘無毒主益氣補不足陶隱居云稷米亦不識書多云黍

與稷相似圖經云稷爲五穀之長呂氏春秋云飯之美者有陽山之稌高誘云關西謂之糜冀州謂之緊皆一物也廣雅解云如黍黑色○考靈耀云日中星鳥可以種稷○雅翼云稷所以爲五穀長者以其中央之穀又古號爲首種孟春種稷之時稷又名粢故祭祀之號稷曰明粢而言粢盛者本之故諸穀皆有粢名○疏云稷苗六月時也稷穗七月時也稷實八月時也

案稷有五名曰稷曰粢曰稌曰糜曰緊舍人注爾雅

云稷粟也郭璞云今江東人呼粟爲粱此二說非是
本草粟米在中部味鹹稷米在下部味甘其治療亦

全別

苗

說文云艸生於田者从艸从田○詩緝曰穀始生曰苗
艸之類始生亦曰苗○公羊注云苗者禾也生曰苗秀
曰禾○呂氏春秋曰苗其弱也欲孤長也欲相與居其
熟也欲相扶是故三以爲族乃多粟

蒼天

傳云蒼天以體言之○爾雅云穹蒼蒼天也春爲蒼天
李廵曰春萬物始生其色蒼蒼故曰蒼天○尚書歐陽
說云夏曰蒼天○莊子云天之蒼蒼其正色耶遠而無
所至極耶○埤雅云詩于高遠難訴每稱蒼天黍離曰
悠悠蒼天此何人哉巷伯云蒼天蒼天視彼驕人矜此
勞人黃鳥曰彼蒼者天殲我良人是也爾雅云穹蒼蒼
天也穹言形蒼言色也桑柔之詩初言倬彼昊天寧不

我矜言昊天則猶望之以其明也次曰靡有旅力以念
穹蒼言方是時厲王無道甚矣小人知念土宇而君子
反無旅力以念穹蒼也

穗

說文云禾成秀也

君子于役篇

雞

爾雅云雞大者蜀蜀子鵠未成雞健絕有力奮雞三尺

爲鷄○易云巽爲雞疏巽主號令雞能知時故爲雞也
○周禮庖人秋行犢麋膳膏腥大宗伯以禽作六摯工
商執雞注取其守時而動雞人凡祭祀面禋饗共其雞
牲○禮記云祭宗廟之禮雞曰翰音又云季冬之月雉
雊雞乳○夏小正云正月雞桴粥桴姬伏也粥養也○
運斗樞云玉衡星散爲雞○春秋說題辭云雞爲積陽
南方之象火陽精物炎上故陽出雞鳴以類感也雞之
爲言佳也佳而起爲大期莫寶也○韓詩外傳田饒云

雞有五德頭戴冠者文也足傳距者武也敵在前敢鬪者勇也見食相呼者仁也守夜不失時者信也○古今注云雞一名燭夜○九家易云風應節而變變不失時雞時至而鳴與風相應二九十八主風精爲雞故雞十八日剖而成雞二九順陽歷故雞知時而鳴也○五行傳云雞之不恭則有雞旤○管輅別傳云雞者兌之畜故太白揚輝則雞鳴○廣志云雞有胡髯五指金散反翅之種大者蜀小者荆九真出長鳴雞○相感志云野

雞屬陰先鳴而後鼓翼家雞屬陽先鼓翼而後鳴○埤
雅云鹽鐵論曰雞廉狼吞雞跑而食之每有所擇故曰
小廉如雞爾雅云雞大者蜀郭璞曰今蜀雞也雞有蜀
魯荆越諸種越雞小蜀雞大魯雞又其大者莊子曰越
雞不能伏鵠卵魯雞固能矣雞知時而善伏王褒云魚
瞰雞睨李善以爲魚目不瞑雞好邪視是也○雅翼云
雞鳴必三度故禮有初鳴而衣服者又能自守不爲風
雨所止故詩人以此不改度之君子雞有冠距文武之

貌不爲威儀貌氣毀故有雞旤

旤

爾雅云雞鑿垣而棲爲旤李巡曰寒鄉鑿墻爲雞作棲
曰旤○說文云西鳥在巢上象形日在西方而鳥棲故
因以爲東西之西字或从木妻○禽經云陸鳥曰棲水
鳥曰宿

夕

說文夕莫也从月半見○埤雅云詩曰雞棲于旤日之

夕矣言雞棲矣日于是夕夕于是月見故象半月未有
蟾桂之狀月滿則夜見半則夕見故也

牛

說文云牛大牲也象角頭三封尾之形牛爲大物天地
之數起于牽牛○釋畜云庠牛犛牛犗牛犝牛犢牛犗
牛犝牛角一俯一仰觶背踊幫黑唇犝黑皆抽黑耳犝
黑腹牧黑脚犢其子犢體長犢絕有力欣假○禮記云
祭天子以犧牛諸侯以肥牛大夫以索牛又云牛曰一



元大武又云諸侯無故不殺牛大夫無故不殺羊士無
故不殺犬豕又云帝牛不吉以爲稷牛帝牛必在滌三
月稷牛惟具所以別事天神與人鬼也又曰牛夜鳴則
厲又云祭天地之牛角繭栗宗廟之牛角握賓客之牛
角尺○周禮庖人春行羔豚膳膏香大司徒祀五帝奉
牛牲羞其肆享先王亦如之封人祭祀飾其牛牲設其
福衡牛人掌養國之公牛以待國之政令凡祭祀共其
享牛求牛

求牛所以
繹者

以授職人而芻之○世本云脰作服

牛肱黃帝臣也又曰少昊時人始駕牛○山海經云稷

之孫曰叔均是始作牛耕○五行傳云思之不容則有

牛禍○相牛經云牛岐胡壽眼中有白脉貫瞳子最快

壁堂

脚股間也

欲濶依欲如絆馬膺庭欲廣天關

背接骨

欲成

雋骨

脊也

欲垂蘭秣欲大捶頭欲高百體欲緊豐岳

膝骨

欲

大垂星

蹄上也

欲得有怒肉力柱欲得大而成

當車骨

懸蹄

欲得如八字陽鹽

夾尾前兩腓上

欲得廣常有似鳴者有黃也

身欲得如卷毛少骨多者有力○雅翼云牛之名色特

牛謂之牝牛父謂之特子謂之犢吳人謂犢曰犢牛羊
無子謂之孺二歲謂之牝三歲謂之犖四歲謂之牝驂
牛謂之牝純色謂之牝駁謂之犖白黑雜毛謂之牝牝
黃白色謂之牝駁如星謂之牝黃牛虎文謂之牝黃牛
黑脊謂之牝白脊謂之牝又謂之牝長脊謂之牝白牛
謂之牝○埤雅云牛土畜也馬火畜也土緩而和火性
健決躁速故易坤爲牛乾爲馬牛病則耳燥安則溫潤
而澤故古之視者以耳祭義所謂牛毛尚耳是也詩曰

殺時犉牡有抹其角抹長貌社稷之牛角尺故曰抹角
牛膏曰香其耳無竅以鼻聽也

月

爾雅曰月在甲曰畢在乙曰橘在丙曰修在丁曰圉在
戊曰厲在巳曰則在庚曰室在辛曰塞在壬曰終在癸
曰極又云正月爲匭二月爲如三月爲寤四月爲余五
月爲臯六月爲且七月爲相八月爲壯九月爲玄十月
爲陽十一月爲辜十二月爲涂○書疏云六歷諸緯與

周髀皆云日行一度月行十三度十九分度之七爲每月二十九日過半○呂覽云義和作占日尚儀作占月

祭

爾雅云雞棲于弋爲櫟又云檝謂之杙注櫟也



六家詩名物疏卷十八

欽定四庫全書

經部

六家詩名物疏卷

十九

詳校官監察御史臣沈孫璉

通政使司副使_臣莫瞻菴覆勘

總校官中書_臣朱 鈐

校對官助教_臣黃昌祺

謄錄監生_臣王秉鈞

欽定四庫全書

六家詩名物疏卷十九

明

馮復京

撰

國風王二

君子陽陽篇

簧

傳云簧笙也。○說文云簧笙中之簧也。笙十三簧象鳳之身正月之音物生故謂之笙。○釋名云笙生也象物貫地而生竹之貫匏以瓠爲之故曰匏竽亦是也其中

汚空以受簧也簧橫也於管頭橫施於中也以竹鐵作
於口橫鼓之亦是也○爾雅曰大笙謂之巢小者謂之
和注巢者列管簧中施簧管端大者十九簧和十三簧
者鄉射記曰三簧一和而成聲疏巢高也言其聲高小
者名和李廵云小者聲少音相和也簧者笙管之中金
薄鏤也笙管必有簧故或謂笙爲簧○白虎通云匏之
言施也在十二月萬物始施而勞笙者太簇之氣象萬
物之生故曰笙有七正之節焉有六合之和焉天下樂

之故謂之笙○風俗通云笙長四寸○世本云隨作笙
○禮記云女媧之笙簧○周禮云笙師掌教吹竽笙以
教祓樂凡祭祀饗射共其鐘笙之樂燕樂亦如之鄭司
農云竽三十六簧○蔡邕云季冬之月上丁入學集吹
所以通氣也管簫笙竽塤箎皆以吹鳴者也○樂書云
匏之爲物其性輕而浮其中虛而通笙以匏爲母象植
物之生焉其卦則艮其方東北之維其時春夏之交其
聲尚識其律大呂太簇其風融其音啾立春之氣也記

曰歌者在上匏竹在下國語曰匏竹利制蓋匏竹相合以成聲得清濁之適故也

案毛解簧爲笙朱子云笙竽管中金葉則指簧體言之而不以爲笙名矣然禮記曰女媧之笙簧又曰仲夏命樂師調笙竽箛簧言笙又言簧者豈簧別一物與漢武內傳許飛瓊鼓震靈之簧神仙傳王遙有五舌竹簧宋時民間有鐵葉簧皆非竽笙中簧也

房

釋名云房旁也在堂兩旁也○疏云天子小寢如諸侯之路寢有左右房○廬陵李氏云堂屋次棟之架曰楣後楣以北爲室與房人君左右房大夫東房西室而已

翽

釋言云翽翽也李巡曰舞者所持翽也又云翽翽也部璞云今之羽葆幢舞者所持以自蔽翽也○禮書云舞者所建以爲容非其所持者也○釋名云翽陶也其貌陶陶下垂也

案爾雅云羆翳也山海經云五采之鳥名翳疑即雉也簡兮所謂右手秉翟者郭以蔽翳釋之恐未然也

教

箋云燕舞之位○錢氏詩說云教遊也因謂教處爲教猶周禮云圉游也

案周禮大胥以六樂之會正舞位諸子掌凡樂事正舞位鄭注禮記云綴謂鄼舞者之位也兆其外營域也其舞于庭則文在東階武在西階其出入于學也

則長者在先幼者在後所謂舞位者如此鄭以此篇之鼓簧爲房中之樂故以教爲燕舞之位燕是燕息之燕非燕樂之燕也天子房中之樂以周南舞未詳此云執翽蓋文舞矣周禮旄人祭祀賓客舞其燕樂謂燕樂之時舞四夷之樂與此燕舞不同

揚之水篇

申

鄭語史伯云當成周者南有申呂○周語富辰云齊許

申呂由太姜○地里志南陽郡宛縣故申伯國○括地志故申城在鄧州南陽縣北三十里○箋云平王母家中國在陳鄭之南迫近強楚○一統志河南南陽府南陽縣附郭周申伯國謝城在湖陽城北周申伯之都自申遷于此信陽縣在府城西南二百七十里周申伯所封縣境有謝城即申伯封邑有二冢相傳以爲申伯冢案嚴坦叔云中國在宛謝城在棘陽宛今南陽縣也棘陽故城在鄧州境荊州記云棘陽東北百里有謝

城則嚴說是也然則宣王之初申伯先受封于今之南陽後更邑于今之鄧州鄧州去郡治百二十里平王之母家申侯當是申伯之子若孫也

甫

書甫刑孔氏注呂侯後爲甫侯故或稱甫刑○唐世系表云宣王世改呂爲甫○左傳楚子重請取于申呂以爲賞田○史記云呂尚先祖爲四岳佐禹治水有功虞夏之際受封于呂徐廣云呂在宛縣○玉海云郡國志

汝南新蔡有大呂亭故呂侯國輿地廣記蔡州新蔡縣
古呂國今以左傳攷之楚有申呂時新蔡屬蔡非楚邑
當以在宛縣爲正○一統志呂城在南陽府城西三十
里虞夏時封呂望先祖于此今名董呂村

蒲

毛傳云蒲艸也○說文云蒲水艸也可以作席蒲蒲子
可以爲平席○周禮醯人深蒲醢醢鄭司農云深蒲蒲
弱入水深故云深蒲○陸璣云蒲始生取其中心入地

者名蒻大如七柄正白生噉之甘脆煮而以苦酒浸之
如食筍法○埤雅云蒲似莞而褊生于水崖輕揚善泛
柔滑而溫可以爲席故禮男執蒲璧言有安人之道也
○詩緝云斯干下莞箋云小蒲則莞精蒲簾○周書云
潤濕不穀樹之竹葦莞蒲礫石不可穀樹之葛木以爲
絺綌○鄭箋云蒲蒲柳○爾雅云楊蒲柳○陸璣云蒲
柳有兩種皮正青者曰小楊其一種皮紅者曰大楊其
葉皆長廣于柳葉皆可以爲箭幹故春秋傳曰董澤之

蒲可勝既乎今又以爲箕籬之楊也○本草圖經云蒲柳其枝勁韌可爲箭筈又謂之萑蒲即水楊也○本草注云水楊葉圓闊而赤枝條短硬多生水岸○古今注云蒲柳生水邊葉似青楊一名蒲楊枝勁細任矢用○國策云夫楊橫樹之則生倒樹之亦生折而樹之又生○世說顧悅云蒲柳之姿望秋而落○詩緝云楊可爲舟又可爲屋材

中谷有蓷篇

荻

爾雅云荻荻疏李巡曰臭穢艸也邵云今芰蔚也廣雅
名益母葉似荻方莖白華華生節間○傳云荻離也○
陸璣云舊說及魏博士濟陰周元明皆云菴藺是也韓
詩及三倉說悉云益母故曾子見益母而感案本草云
益母芰蔚也故劉歆曰荻臭穢臭穢即芰蔚也○本草
經云芰蔚子一名益母一名益明一名大札一名貞蔚
生海濱池澤陶隱居云葉如荻方莖子形細長三稜圖

經云苗葉上節節生花實似雞冠子黑色衍義云荒蔚子葉至初春亦可煮作菜食凌冬不凋悴

案毛傳云雅離大車傳云莢離考本草諸書荒蔚子竝無離名豈毛以雅爲莢乎毛又云陸草生谷中傷于水據本草荒蔚正生海濱池澤非陸草也魏博士等以爲菴蘭本草菴蘭生雍州川谷及上黨道邊春生苗葉如艾蒿高三二尺七月開花八月結實亦無雅名不知古人何以云爾

兔爰篇

羅

爾雅云鳥罟謂之羅郭云謂羅落之○周禮羅氏掌羅
鳥鳥罟則作羅襦中春羅春鳥獻鳩以養國老行羽物
注襦細密之羅○禮記曰鳩化爲鷹然後設罝羅

案鳥罟曰羅朱傳曰張羅本以取兔者蓋正釋則定
散文亦通也周禮羅氏掌羅鳥而郊特牲言大羅氏
天子之養鳥獸者諸侯貢屬焉莊子削格羅落置罟

之智多則獸亂于澤是取獸得稱羅也大東傳云畢
所以掩兔而駕鴛詩云畢之羅之兔罟謂之罝而西
京賦云結罝百里實兼諸網罟而言之凡如此類並
得通也

罝罟

釋器云罝謂之罝罝罝也罝謂之罝罝覆車也孫炎曰
覆車網可以掩兔郭璞曰今之翻車也有兩轆中施罟
以捕鳥展轉相解廣異語○韓詩說云施羅于車上曰

量○東漢書注云罕雉網

葛藟篇

許

爾雅云岸上許又云許水厓

渙

說文云渙水厓也○爾雅云渙爲厓郭注謂水邊

渚

爾雅云夷上洒下曰渚李巡曰夷上平上洒下消下故

名漚郭璞曰厓上平坦而下水深者爲漚不發聲也

昆

爾雅云昴兄也注江東人通言昴

采葛篇

蕭

爾雅云蕭荻○說文云蕭艾蒿也○陸璣云今人所謂
荻蒿者是也或云牛尾蒿似白蒿白葉莖麓科生多者
數十莖可作燭有香氣故祭祀以脂爇之爲香許慎以

爲艾蒿非也禮王度記曰士蕭庶人艾蕭艾不同明矣
○周禮甸師祭祀共蕭茅○郊特牲云既奠然後藝蕭
合馨香祭義云見有蕭光以報氣也加以鬱鬯以報鬼
也○雅翼云蕭生于春待秋三月乃成○詩緝云蒿者
總名蕭蒿之香者也

艾

爾雅云艾冰臺疏今艾蒿也○本草經云艾葉味苦微
溫無毒主灸百病一名冰臺一名醫艸生田野圖經云

初春布地生苗莖類蒿而葉皆白以苗短者爲佳陳久方可用○崔寔四人月令云三月可採艾○師曠占云歲欲疫病艸先生病艸艾也○廣雅云天子祭以鬯諸侯以薰卿大夫以蒹蘭士以蕭庶人以艾○字說云艾可入疾久而彌善故爾雅云艾長也艾歷也

大車篇

大車

疏云巾車職云大夫乘墨車然則王朝大夫於禮當乘

墨車以大夫出封如子男之服則乘諸侯之車此大車
蓋革路也○巾車云革路龍勒條纓五就建大白以即
戎以封四衛注革路鞅以革無他飾龍驪也以白黑飾
韋雜色爲勒條應爲條以條絲飾繁纓四衛四方諸侯
守衛者又云服車五乘孤乘夏篆卿乘夏縵大夫乘墨
車士乘棧車庶人乘役車注墨車不畫

毳衣

周禮司服云王之吉服祀四望山川則毳冕子男之服

自毳冕而下鄭注云毳畫虎雖謂宗彝也其衣三章裳

二章凡五

衣三章宗彝也藻也皆繪粉米亦刺繡裳二章黼也黻也皆繡

子男毳冕朝

聘天子及助祭之服諸侯非二王後皆玄冕而祭于已

○釋名云毳芮也畫藻文于衣象水州之毳芮溫暖而潔也○三禮圖云毳冕子男服以朝天子

案毳冕子男朝聘天子之服此大夫四命其出封五命或本諸侯子男入爲大夫其得服毳衣固也但非聽訟之服說文引此詩毳衣如蒺蒺作紉云帛駢色

也毳衣如璫璫作毯云以毳爲縹色如麋故謂之毯
麋禾之赤苗也其解縹云西胡毳布解毳云獸細毛
豈以毳布爲衣其青者如騅帛赤者如禾之赤苗乎
若然則與毳冕名同實異或云蒺玄色言其衣如之
璫縹色言其裳如之玄衣纁裳所謂大夫玄冕也上
大夫卿故得服毳衣然玄冕亦所以朝聘王之大夫
其祭于已即用爵弁不服玄冕况聽訟乎宗彛鄭以
爲虎雉孔氏書傳云宗廟彛樽以山龍華蟲爲飾古

禮湮亡未知誰得其正

璫

說文云玉赭色也赤之赤苗謂之璫言璫玉色如之

穴

箋云謂塚壙中也○禮記云合葬非古也自周公以來
未之有改也

丘中有麻篇

麻

爾雅云枲麻賡枲實苧麻母苧苧苧麻子之盛子者也
○周禮注云枲是雄麻苧是麻之有黃實者○本草圖
經云麻賡麻子田園所蒔績其皮以爲布者麻賡一名
麻勃麻上花勃勃者七月七日採麻子九月採陶隱居
以麻賡爲牡麻牡麻則無實蘇恭以爲黃即實非花也
案本經朱子云麻賡味辛麻子味甘此又似二物疑本
草與爾雅禮記稱謂不同耳○雅翼云麻之屬總名麻
別而言之則有實者名苧無實者名枲子夏喪服傳曰

苴經者麻之有蕒者也牡麻者枲麻也蕒即實也牡即
無實之名然亦通名麻枲麻實有文理故屬金爲西方
之穀明堂月令秋食麻與犬古者朝事之饗熬麻麥以
實之謂之麴蕒于植物中最多子又有櫟者亦麻類有
實又胡麻亦有實本生大宛一名油麻淳黑者名巨勝
亦曰一葉兩莢爲巨勝枲麻與麥互相爲候麥黃種麻
麻黃種麥種枲太早則堅剛厚皮多節晚則皮不堅寧
失于早不失于晚○春秋說題辭云麻之爲言微也陰

精寢密女作纖微也麻生於夏夏衣物成禮儀故麻可
以爲衣陽成于三物以化故三變縷布也宋均曰麻枝
葉成謂之衣三變生成形之變也漚取皮二變也績成
爲縷三變也○月令云仲冬之月天子乃以犬嘗麻先
薦寢廟○周禮云典枲掌布總縷紵之麻草之物以待
時頒功而授齋及獻功受苦功以其賈揭而藏之以待
時頒疏云苦功謂麻功謂監簏之功○呂覽云得時之
麻必苦以長疎節而色陽小本而莖堅厚枲以均後熟

多榮日夜死復生如此者不蝗○管子云五沃之土其陽則安樹之五麻若高若下不擇疇所其麻大者如箭如葦大長以美其細者如藿如蒸欲有與各大者不類小者則治揣而藏之若衆練絲○淮南子云汾水濛濁而宜麻○四時纂要云種麻熟耕地從橫七遍已上生則無葉○四民月令云二月三月可種苴荼

留

曹氏云留本邑名其大夫以爲氏○路史國名陶唐氏

後云長子之後姁姓留也丘中有麻彼留子國者漢隸
彭城子房之封

案留古劉字說文有鋤而無劉漢因識有卯金刀之
說妄也丘中有麻王國之風所咏當爲周地今河南
緱氏縣有劉聚周大夫劉康公劉夏劉摯劉狄皆食
采于此非彭城之留也

食

說文云食一米也从皀人聲○周書云黃帝始蒸穀爲

飯烹穀爲粥○周禮膳夫王食用六穀食醫掌和王之
六食○禮記云食養陰氣也又云食齊視春時羹齊視
夏時醬齊視秋時飲齊視冬時○釋名云食殖也所以
自生殖也○古史考云神農時人方食穀加米于燒石
之上而食之黃帝時始有釜甑火食之道成矣

六家詩名物疏卷十九

欽定四庫全書

六家詩名物疏卷二十

明 馮復京 撰

國風鄭一

鄭

譜云初宣王封母弟友于宗周畿內咸林之地是爲桓
公今京兆鄭縣是其都也爲幽王大司徒幽王爲犬戎
所滅桓公歿之子武公與晉文侯定平王于東都王城
取虢檜鄢蔽補丹依疇歷華之地右洛左濟前茅後河

食漆洧焉今河南新鄭是也○地理志云鄭國今河南之新鄭本高辛氏火正祝融之墟及成皋滎陽潁川之崇高陽城皆鄭分也土險而狹山居谷汲男女亟聚會故其俗淫武公後二十三世爲韓所滅

按宗周咸林今陝西西安府華州有鄭城即桓公采地其後武公徙河南曰新鄭故莊公曰先公新邑于此新鄭縣今屬河南開封府鈞州及開封之鄭州滎陽汜水縣即漢成皋河南府之登封即漢陽城崇高

二縣皆鄭地也

緇衣篇

緇衣

釋名云緇澤也泥之黑者曰澤此色然也○考工記云
三入爲纁五入爲緇七入爲緇注染纁者三入而成又
再染以黑則爲緇又復再染以黑乃成緇矣○論語疏
云案玉藻諸侯朝服以日視朝于內朝士冠禮云主人
玄冠朝服緇帶素鞶注云玄冠委貌朝服者十五升布



衣而素裳不言色者衣與冠同色是朝衣色玄玄即緇色之小別故知緇衣羔裘是諸侯君臣日視朝之服也

館

箋云卿士所之之館在天子宮如今之諸廬○考工記內有九室九嬪居之外有九室九卿朝焉注內路寢之裏也外路門之表也九室如今朝堂諸曹治事處○孔氏云禮有公館私館館者宮室之名

粢

傳云粢餐也諸侯入爲天子卿士食采祿○周禮疏云
載師家邑任稍地則大夫之采也小都任縣地則六卿
之采也大都任疆地則三公之采也古者祿皆月別給
之若今月奉○爾雅云粢餐鄙璞曰今河北人呼食爲
粢○朱傳或曰粢粟之精鑿者○說文云稻重一秬爲
粟二十斗爲米十斗曰穀爲米六斗大半斗爲粢

將仲子篇

里

說文云里居也○周禮小宰以官府之八成經邦治三
曰聽閭里以版圖又遂人云五家爲鄰五鄰爲里里宰
掌比其邑之衆寡與其六畜兵器治其政令以歲時合
耦于耜以治稼穡徵歛其財賦○風俗通云五家爲軌
五軌爲里里者止也五十家共居止也○書大傳云古
者處師八家而爲鄰三鄰而爲朋三朋而爲里五里而
爲邑十邑而爲都十都而爲師州有十二師焉家不盈
三口者不朋由命士以上不朋○王度記云百戶爲里

里一月○撰考識云古者七十二家爲里

杞

爾雅云旄澤桺○陸璣云杞桺屬也生水旁樹如桺葉
麤而白色理微亦其材堅韌故今人以爲車轂今其北
淇水旁魯國太山汶水邊純杞也○本艸圖經云今人
取其細條火逼令柔韌屈作箱篋河朔猶多告子云以
人性爲仁義猶以杞桺爲栝櫟是也○通志云杞桺亦
曰澤桺可爲栝櫟者

園

說文云所以樹果也○周禮太宰九職二曰以園圃毓
艸木注樹果蒨曰圃園其樊也又云載師以場圃任園
地園廛二十而一○天文要集曰瓠瓜爲天子果園又
天園主果實菜茹畜儲○孔氏云有蕃曰園有墻曰圃
園圃大同蕃墻異耳

檀

陸璣云檀木皮正青滑澤與槩迷相似又似梓榆槩迷

一名挈榼故齊人諺曰上山斫檀挈榼先殫○論衡云
楓桐之樹生而速長故其皮膚不能堅剛樹檀以五月
生葉後彼春榮之木其材彊勁車以爲軸○雅翼云淮
南子十月檀檀陰木也

叔于田篇

田

爾雅云春獵爲蒐夏獵爲苗秋獵爲獮冬獵爲狩宵田
爲獠火田爲狩○左傳云春蒐夏苗秋獮冬狩皆于農

隙而講事也○公羊傳云春曰苗秋曰蒐冬曰狩○穀
梁傳云四時之田皆爲宗廟之事也春曰田夏曰苗秋
曰蒐冬曰狩○又昭八年蒐于紅傳云艾蘭以爲防置
旃以爲轅門以葛覆質以爲繫苟流握御輶者不得入
車軌塵馬候蹄掩禽旅御者不失其馳然後射者能中
過防不逐不從奔之道也面傷不獻不成禽不獻禽雖
多天子取三十焉其餘與士衆以習射于射宮○周禮
太宰田役以御其衆大司徒大田役以旗致萬民治其

徒庶之政令鄉師凡四時之田前期出田法于州里簡其鼓鐸旗物兵器脩其卒伍及期以司徒之大旗致衆庶而陳之以旗物辨鄉邑而治其政令刑禁巡其前後之屯而戮其犯命者斷其爭禽之訟遂人師田作野民帥而至掌其政治禁令大宗伯大田之禮簡衆也大司馬中春教振旅遂以蒐田中夏教蒐舍遂以苗田中秋教治兵遂以獮田中冬教大閱遂以狩田○禮記云國君春田不圍澤大夫不掩羣士不取麇卵又云天子諸

侯無事則歲三田一爲乾豆二爲賓客三爲充君之庖
無事而不田曰不敬田不以禮曰暴天物天子不合圍
諸侯不掩羣天子殺則下大綏諸侯殺則下小綏大夫
殺則止佐車佐車止則百姓田獵昆蟲未蟄不以火田
不麝不卵不殺胎不死夭不覆巢○易云作結繩而爲
網罟以佃以漁蓋取諸離○白虎通云四時之田總名
爲田何爲田除害也○春秋繁露云春苗秋蒐冬狩夏
獮

巷

說文云里中道从𨾏从共皆在邑中所共也篆文从𨾏省作巷

狩

夏小正云十有二月王狩冬獵爲狩陳筋革陳筋革者省兵甲也○爾雅冬獵爲狩疏狩圍守也冬物畢成獲則取之無所擇也○何休公羊注云狩猶獸也冬時禽獸長大遭獸可取○爾雅又云火田爲狩李巡孫炎曰

放火燒草守其下風

按火田爲狩正以冬時昆蟲既蟄可以火田耳部景
純云放火燒草獵亦爲狩非也

大叔于田篇

數

說文云大澤也○周禮注云澤水所鍾也水希曰數○
韓詩云禽獸居之曰數○風俗通云數之爲言厚也艸
木魚鼈所以厚養人君與百姓○周禮職方氏揚州其

澤藪曰具區荊州曰雲夢豫州曰圃田青州曰望諸兗
州曰大野雍州曰弦蒲幽州曰獫狁冀州曰陽紆并州
曰昭餘祁○爾雅十藪云魯有大野晉有大陸秦有楊
陁宋有孟諸楚有雲夢吳越之間有具區齊有海隅燕
有昭餘祁鄭有圃田周有焦護○國語太子晉云古者
長民不崇藪藪物之歸也○左傳云山藪藏疾○疏云
此言在藪蓋在圃田也

火

釋名云火化也消化物也○元命包云火之言委隨也
故其立字人散子爲火○考異郵云火者陽之精也○
易曰離爲火又曰燠萬物者莫燠乎火又曰火就燥○
尚書云五行二曰火火曰炎上炎上作苦○左傳云古
之火正或食于心或食于味以出內火是故味爲鶉火
心爲大火○周禮司燿掌行火之政令四時變國火以
救時疾季春出火民咸從之季秋內火民亦如之時則
施火令司烜氏掌以夫燧取明火于日○尸子云燧人

上觀星辰下察五木以爲火○河圖挺佐輔云伏羲禪
于伯牛鑽木作火○鄒子曰春取榆柳之火夏取棗杏
之火季夏取桑柘之火秋取柞櫟之火冬取槐檀之火
按火烈具舉箋以爲列人持火疏云此爲宵田持火
炤之蓋以王制云昆蟲未蟄不以火田故爾雅曰冬
獵爲狩火田爲狩此于田未必是冬則是宵田用火
以炤也然大司馬仲春教振旅遂以蒐田火弊獻禽
以祭社鄭氏云春田主用火因焚萊除陳草皆殺而

火止則春田亦用火曹氏詩說云刈草爲防驅禽納諸防中然後焚而射四時之田皆然也

黃

魯頌駟傳云黃驊曰黃○陸農師云黃亦馬之上色列子曰牝而黃牡而驪馬至果天下之馬也明堂位曰周人黃馬蕃鬣言吉事乘此詩四黃既駕是也至于戎事則乘驪

射

周禮鄉大夫云以鄉射之禮五物詢衆庶一曰和二曰容三曰主皮四曰和容五曰興舞保氏養國子以道乃教之六藝三曰五射鄭司農云五射白矢參連剡注襄尺井儀也又車僕大射共三乏司射凡射共獲旌射人以射法治射儀諸子秋合諸射以考其藝而進退之大僕王射贊王弓矢繕人掌詔王射○禮記孔子曰士使之射不能則辭以疾懸弧之義也又云古者諸侯之射也必先行燕禮鄉大夫士之射也必先行鄉飲酒之禮

其節天子以騶虞爲節諸侯以狸首爲節卿大夫以采
蘋爲節士以采蘩爲節古者諸侯歲貢士于天子天子
試之于射宮其容體比於禮其節比于樂而中多者得
與于祭射之爲言繹也或曰舍也繹者各繹已之志也
故心平體正持弓矢審固則射中矣又云天子將祭必
先習射于澤已射于澤而後射于射宮○吳越春秋陳
音云古者人民死則裹以白茅投于中野孝子不忍見
父母爲禽獸所食作彈以守之於是神農黃帝弦木爲

弧剡木爲矢黃帝之後楚有弧父所射無脱以其道傳
羿羿傳逢蒙逢蒙傳于楚琴氏○列女傳工人妻云妾
聞射之道左手如拒右手如附支右手發左手○禮書
云弧矢之作始于黃帝侯以明之見于虞書至周弓之
別有六矢之割別有八侯之別有三則大射賓射燕射
之侯也士無大射而有賓射燕射庶人無賓射燕射特
有主皮之射而已射義曰古者諸侯貢士于天子天子
試之于射宮則貢士與射其來尚矣

御

周禮保氏教六藝四曰五馭鄭司農云五馭鳴和鑾逐水曲過君表舞交衢逐禽左○王制凡執技論力羸股肱決射御月令孟冬命將帥習射御內則成童學射御○列子造父之師曰秦豆氏告造父曰推於御也齊輯乎轡銜之際急緩乎脣吻之和正度乎胸臆之中執節乎掌握之間內得於中心外合於馬志是故能進退履繩而旋曲中規取道致遠而氣力有餘○呂覽云寒哀

作御

鵠

爾雅云驪白雜毛鵠疏毛色黑白而復有雜毛相錯者
今謂之烏驪○埤雅云鵠蓋取諸鵠今鵠其色驪白

棚

詩義問云棚所以覆矢也謂箭筒蓋○左傳云公徒執
冰而踞服虔云冰櫝丸蓋杜預云或說櫝丸是箭筒其
蓋可以取飲○華谷嚴氏云用矢則舉棚以開箒既用

則納矢箙中釋下棚以覆箙

𢱑

疏云𢱑者盛弓之器○朱傳云弓囊也與韞同○說文
韞弓衣也○禮書云𢱑弣韞囊韞皆弓衣也亦曰弓室
覲禮言包干戈以虎皮詩言虎韞而韞韞皆從韞則古
之弓衣以韞爲之詩言交韞二弓則一韞之內皆二弓
以備缺折

弓

釋名云弓穹也張之穹隆然也○山海經云少昊生般始爲弓矢帝俊賜羿彤弓素繪以扶下國○荀子云倕作弓○墨子云羿作弓○古今姓纂云黃帝第五子青陽生揮爲弓正觀弧星始制弓矢○爾雅云弓有緣者謂之弓無緣者謂之弣以金者謂之鈇以蜃者謂之玼以玉者謂之圭○易云弦木爲弧剡木爲矢弧矢之利以威天下蓋取諸睽○書云和之弓在東房○周禮司弓矢掌六弓之法中春獻弓弩及其頌之王弓弧弓以

授射甲革楯質者夾弓庾弓以授射紆侯鳥獸者唐弓
大弓以授學射者使者勞者天子之弓合九而成規諸
侯合七而成規大夫合五而成規士合三而成規句者
謂之弊弓繕人掌王之用弓弩橐人弓六物爲三等弩
四物亦如之又云弓長六尺謂之庇軹五尺謂之庇輪
四尺謂之庇軫弓人爲弓取六材必以其時幹以爲遠
也角以爲疾也筋以爲深也膠以爲和也絲以爲固也
漆以爲受霜露也凡爲弓冬析幹而春液角夏治筋秋

合三材寒奠體冰析澍春被弦則一年之事橋幹欲孰于火而無羸橋角欲孰于火而無燂引筋欲盡而無傷其力鬻膠欲孰而水火相得然則居旱亦不動居濕亦不動材美工巧爲之時謂之參均角不勝幹幹不勝筋謂之參均量其力有三均均者三謂之九和弓長六尺有六寸謂之上制上士服之弓長六尺有三寸謂之中制中士服之弓長六尺謂之下制下士服之往體多來體寡謂之夾庾之屬利射侯與弋往體寡來體多謂之

王弓之屬利射革與質往體來體若一謂之唐弓之屬
利射深覆之而角至謂之句弓覆之而幹至謂之侯弓
覆之而筋至謂之深弓○周禮注云夾庾之弓合五而
成規王弧合九而成規唐大合七而成規○疏云天子
之弓王弧諸侯之弓唐大夫之弓夾庾士之弓則六
弓之外弓曲近射用弱弓射大侯者用王弧射參侯者
用唐大此據諸侯言之若據天子則用王弧射虎侯用
唐大射熊侯用夾庾射豹侯也○禮書云弓以木爲身

以角爲面筋所以爲深絲所以爲固張則筋外而角內
弛則角外而筋內附把中也簫弓端也隈其曲也茭其
接也附或作拊又曰質旁曰撻中曰救簫或曰弣又曰
弣曰弩曰峻○方言云弓謂之鞬或謂之贖

清人篇

清

郡國志河南中牟縣有清口水○水經注清池水出清
陽亭西南平地東北流逕清陽亭南東流即故清人城

也詩清人在彭彭爲高克邑杜預春秋釋地云中牟縣
西有清陽亭是也清水又屈而北流至清口澤

中年今屬開封

府

彭河上消軸

傳云彭衛之河上鄭之郊也消軸河上地孔氏云彭消
軸皆河上之地蓋久不得歸師有遷移三地亦不相遠

介

說文云鎧甲也釭臂鎧也鉏鍛頸鎧也○世本云杼作

甲宋衷曰少康之子○周禮司甲下大夫二人中士八人考工記云燕之無函也非無函也夫人而能爲函也又云函人爲甲犀甲七屬兕甲六屬合甲五屬凡爲甲必先爲容然後制革權其上旅與其下旅而重若一以其長爲之圍凡甲鍛不摯則不堅已敕則撓凡察革之道眡其鑽空而窻則革堅眡其苟而易則材更視其朕而直則制善橐之而約則周也舉之而豐則明也衣之無斷則變也○少儀云國家靡敕甲不組滕○家語云

家不藏甲○管子云葛盧之山發而出水金從之蚩尤受而制之以爲劍鎧○荀子云楚人斂革犀兕以爲甲堅如金石○漢書云甲不堅密與袒裼同此將不省兵之禍也○初學記云甲下飾謂之裳見左傳甲藏謂之纍見國語甲衣謂之橐見禮記○禮書云甲亦曰介曰函曰鎧則甲猶植物之有甲也介猶互物之有介也函所以周其身鎧所以致其愷經言甲而不及鎧則古者之甲以革爲之後世乃用金耳詩曰駟介彭彭又曰伐

駟孔羣左傳曰不介馬而馳之鄭氏曰淺淺金也秦人以淺金介馬古或用革與否不可考也

矛

釋名云矛冒也刃下冒矜也夷矛夷常也其矜長丈六尺不曰常而曰夷者言其可夷滅敵亦車上所持也○方言云矛吳揚江淮南楚五湖之間謂之鉞或謂之鉞或謂之鉞或謂之鉞其柄謂之矜凡矛骹細如雁頸者謂之鶴膝○世本云杼作矛○考工記云廬人爲廬器酋矛常有

四尺夷矛三尋刺兵

矛屬

同強舉圍欲重重欲傳人傳人

則密是故侵之凡爲酋矛三分其長二在前一在後而
圍之五分其圍去一以爲晉圍參分其晉圍去一以爲
刺圍○禮書云說文曰矛象形然則自考工言之則爲
刺兵自說文言之則爲勾兵蓋矛之爲器上銳而旁勾
上銳所以象物生之芒旁勾所以象物生之勾酋言其
就夷言其易短者其體就長者其體易此矛之辨也鄭
氏曰矛戟柄竹櫨秘則矛之柄亦以竹矣然詩公矛鏐

鍬說文云鋌小矛也風俗通曰矛長八尺謂之稍則矛之制固不一矣

英

閔宮疏云蓋絲纏而朱染之以爲矛之英飾○王氏云英之以毛羽○朱傳云以朱羽爲矛飾

喬

傳云重喬累荷也箋云喬矛矜近上及室題所以縣毛羽疏矜謂矛柄室矛之登孔題表識也箋申傳意言矛

柄近于上頭及矛釜室之下有旌以題識之其題識者所以縣毛羽二矛于其上頭皆縣毛羽以題識之似如重累相負荷然故謂累荷○朱傳云矛之上句曰喬所以縣英

按孔疏英云絲纏喬云懸羽則與朱傳言喬所以懸英者異矣釋文累荷之荷舊音何云刻矛頭爲荷葉則與鄭箋不合孔云箋申傳意蓋取沈氏兩矛飾相負荷之說也然孔閔宮疏解朱英絲纏本無的據故

云蓋以疑之鄭云矛有毛羽亦指時驗朱云矛之上
勾曰喬蓋緣爾雅木上勾曰喬以類推知之並非確
證韻會注喬字居祆切者云又矛矜也然則鄭以矛
矜爲喬下二句或并解喬之飾耶果爾則當讀居祆
切不當讀渠驕切韓詩又作鷁字不知何解或曰鷁
雉名雉飛高止一丈長止三丈一起即下故矛有謂
之喬下向而曲狀如雉飛見日久英弊所存者喬耳
諸說紛然予謂不若直從毛氏毛云重喬累荷也蓋

爾雅喬之詁爲高矛建于車五兵之最高者也酋矛
短夷矛長重累而見故曰重猶云重英耳豈有他義

乎

中軍

朱傳云謂將在鼓下居車之中○周禮云王六軍大國
三軍次國二軍小國一軍軍將皆命卿○左傳云中權
後勁

羔裘篇

豹

易云君子豹變其文蔚也○爾雅云貔白豹注似熊小
頭庠脚黑白駁能舐食銅鐵及竹骨骨節強直中實少
髓皮辟濕或曰豹白色者別名白貔音陌○陸疏云毛
赤而文黑謂之赤豹毛白而文黑謂之白豹○本草圖
經云豹皮人寢可以驅濕癘今黔蜀中時有貔象鼻犀
目牛尾虎足土人鼎釜多爲所食其齒以刀斧錐鍛鐵
皆辟落火亦不能燒人得之詐爲佛牙佛骨以誑俚俗


衍義云豹毛赤黃其文黑如錢而中空此比相次此獸
猛捷過虎故能安五藏補絕傷輕身又有土豹毛更無
文色亦不赤其形小此各有種非能變爲虎也○埤雅
云豹一名程列子曰程生馬古詩曰餓狼食不足飢豹
食有餘言狼貪豹廉有所程度而食其字从勺當爲此
也淮南子曰蝟使虎申蛇令豹止物各有所制也○雅
翼云豹似虎而圈文有赤有玄有白山海經泰山多赤
豹幽都之山有玄虎玄豹王會篇云屠州有黑豹白豹

別名獬今出建寧郡毛黑白臆似熊而小能食蛇以舌
舐鐵可頰進數十斤溺能消鐵為水 廣志云狐死首
丘豹死首山是性之異也 列女傳陶荅子妻云南山
有玄豹霧雨七日不下食者何也欲以澤其衣毛而成
其文章故藏以遠害 洞冥記青豹出浪坂之山狀如
虎色如翠

豹飾

疏云唐風云羔裘豹祛羔裘豹袖然則緣以豹皮謂之

為袂袖也禮君用純物臣下之故袖飾異皮 禮書云
豹取其武而有文



六家詩名物疏卷二十

欽定四庫全書

經部

六家詩名物疏卷二十一

詳校官監察御史_臣沈孫璉

通政使司副使_臣莫瞻菴覆勘

總校官中書_臣朱 鈐

校對官助教_臣黃昌祺

謄錄監生_臣王秉鈞

欽定四庫全書

六家詩名物疏卷二十一

明

馮復京

撰

國風鄭二

遵大路篇

祛

疏云袂是祛之本祛爲袂之末俱是衣袖○釋名云祛
虛也○玉藻云深衣三祛袂可以同肘長中繼拊尺祛
尺二寸○喪服記云袂屬幅祛尺二寸注云祛袖口也

尺二寸足以容中人之併兩手

女曰雞鳴篇

明星

蘇氏云明星啟明也○爾雅云明星謂之啟明孫炎曰
明星太白也出東方高三舍今日曰明星昏出西方高三
舍今日曰太白郭曰太白星也晨見東方爲啟明昏見西
方爲太白○天官占云太白者金之精西方白帝之子
上公大將軍之象也徑一百里○天官書云太白曰西

方秋司兵主殺殺失者罰出太白率一歲一周天出東方百二十日入西行百二十日旦入入以辰戌出以丑未出不經天經天天下革政日方南金居其南日方北金居其北曰羸用兵進吉退凶日方南金居其北日方北金居其南曰縮用兵退吉進凶太白白比狼赤比心黃比參左肩蒼比參右肩黑比奎大星亢爲疏廟太白廟也太白大臣也其號上公其他名殷星大正營星觀星宮星明星大衰大澤終星大相天浩序星月緯大司

馬位○河圖云大白散爲天杵天杼伏霧大敗司姦天
狗天殘卒起白婁○嚴氏云蘇氏以明星爲啟明蓋今
俗所謂曉星也毛氏謂天將曉則小星不見惟明大之
星爛然雖不指爲啟明然將曉而明大者惟啟明耳

弋

箋云弋繳射也○夏官司弓矢矰矢箠矢用諸弋射注
云結繳于矢謂之矰矰高也箠矢象馬箠之言矠也二
者皆可以弋飛鳥矠羅之也○埤雅云弱弓微矢乘風

振之曰弋

鳬

爾雅云鵒沈鳬郭云似鴨而小長尾背上有文今江東亦呼爲鵒又云鳬雁醜其足蹠其踵企○陸璣云大小如鴨青色卑脚短喙水鳥之謹愿者也○埤雅云沈鳬好沒與雁常以晨飛容與與波上下○雅翼云陸龜蒙稱夜聞有聲類暴雨者一夕數四明訊其畝曰鳬鷺也其曹蔽天而來必竭禾穗而去江南不能弋羅常樂而

得之鳬所在必賊梁食古人亦養之今江東有小鳬其
多無數俗謂之冠鳬善飛方言曰野鳬甚小而好沒水
中者南楚之外謂之鴈鵞○莊子云鳬脰雖短續之則
憂○古今注云鳬雁常住海邊沙上食沙石皆消爛惟
食海蛤不消

有女同車篇

舜

爾雅云檟木槿櫬木槿注別二名也似李樹華朝生夕

隕或呼日及亦曰王蒸○廣雅云一名朱槿一名赤槿
○月令云仲夏木槿榮○本艸云木槿作飲服之令人
得睡花作湯代茶喫治風○衍義云如小葵花淡紅色
五葉成一花湖南北人家多種植爲籬障○埤雅云木
槿一名舜瞬之義取此○雅翼云抱朴子曰木槿楊柳
斷植之更生倒之亦生橫之亦生生之易者莫過斯木
仲夏應陰而生其花朝開暮落莊生以爲朝菌○篤論
云日給之華似柰柰實而日給虛虛僞之與真實相似

也○羅浮山記木槿花甚丹四時敷榮○傳玄云薺花
麗木也謂之日給或謂之洽容或謂之愛老潘尼以爲
朝菌○傳咸賦云應青春而敷榮逮朱夏而誕英布夫
天之纖枝發灼灼之殊榮紅葩紫蒂翠葉素莖含暉吐
曜爛若列星○成公綏云日及華甚鮮茂榮于孟夏訖
于孟秋

英

爾雅云艸謂之榮榮而不實謂之英○人物志云艸之

精秀者爲英

山有扶蘇篇

扶蘇

傳云扶胥小木

荷華

說文云荷芙蕖葉茄芙蕖莖芙蓉華未發爲菡萏已發爲芙蓉○爾雅云荷芙蕖其莖茄其葉蓮其本密其華菡萏其實蓮其中的的中薏李巡曰分別蓮莖華葉實

之名芙蕖其總名也別名芙蓉江東呼荷郭璞曰莖莖
下白藕在泥中者蓮謂房也○陸疏云蓮青皮裏白子
爲的的中有青長三分如鉤爲薏語曰苦如薏也的五
月中生生啖脆至秋表皮黑的成可食或磨以爲飯輕
身益氣令人強健○援神契曰王者德至于地則華草
感注云華草並頭蓮也○韓詩秉簡注云簡蓮也○古
今注云荷華華之最秀異者一名水芝一名水花花有
赤白紅紫青黃紅白二色差多大者至百葉○王文公

云蓮花有色有香得日光乃開雖生于水水不能沒雖在汙泥泥不能汙即華時有實然華事始則實隱華事已則實見○埤雅云荷總名也其的中有青爲萵皆倒生兩牙一成芰荷一藕荷也又生一牙爲華藕荷帖水生藕者也芰荷無藕卷荷也與華偶生出水上亭亭如繖者亦或謂之距荷藕荷一本其支旁行爲藕節生一華一葉○本草衍義云粉紅千葉白千葉者皆不實其根惟白蓮爲佳今禁中又生碧蓮亦一端也

龍

爾雅云紅龍古其大者歸○陸璣云一名馬蓼葉大而赤白色生水澤中高丈餘○本艸經云葑艸主消渴去熱明目益氣一名鴻鵠如馬蓼而大生水旁五月採實○陶隱居云馬蓼生下濕地莖班葉大有黑點最大者是葑艸圖經云葑艸即水紅下濕地皆有之詩隰有游龍是也陸璣云一名馬蓼本經云似馬蓼而大若然馬蓼自是一種○管子云五位之土其山之淺有龍與斥

穽兮篇

穽

說文云艸木凡皮葉落墜地爲穽

褰裳篇

秦

說文引詩澮與有澮水出鄭國王伯厚云秦水出桂陽
臨武入匯當以澮爲正○水經云澮水出鄭縣西北平
地南入洧水○一統志秦水出河南開封府密縣一名

澮水東北至新鄭縣與洧水合○鄭語云主芣騶而食
溱洧

洧

水經云洧水出河南密縣西南馬領山又東過鄭縣南
澮水從西北來注之又東過習陽城西折入于潁注云
洧水東逕新鄭故城中襄元年晉伐鄭敗其徒兵于洧
上又東爲洧淵水龍鬬于時門之外洧淵則此潭也洧
水又東與黃水合經謂澮水非也○一統志洧水源出

密縣東至新鄭縣會溱水爲雙泊河至西華縣入黃河
丰篇

堂

釋名云堂猶堂堂高顯貌也○禮記云堂上不趨堂上
接武堂下布武又云禮有以高爲貴者天子之堂九尺
諸侯七尺大夫五尺士三尺○書大傳云天子之堂廣
九雉諸侯七雉伯子男五雉士三雉○孫毓云禮門側
之堂謂之塾○士喪疏云房戶之外由半以南謂之堂

士昏疏云其內由半以北亦謂之堂○箋云堂當為棖
○爾雅云棖謂之闕棖謂之楔孫炎曰棖門限也李巡
曰楔謂闕上兩旁木○禮記云君入門介拂闌大夫中
棖與闌之間士介拂棖賓入不中門不履闕公事自闌
西私事自闌東

東門之墀篇

東門

詩緝云東門鄭要會之地隱公四年左傳宋公陳侯蔡

人衛人伐鄭園其東門

墠

傳云墠除地町町者○禮記注封土曰壇除地曰墠書
曰三壇同墠

茹蘆

爾雅云茹蘆茅蒐○說文云茹蘆人血所生○本艸茜
根可以染絳一名地血一名茹蘆一名茅蒐一名蒨蜀
本圖經云染緋艸葉似棗葉頭尖下濶莖葉俱澁四五

葉對生節間蔓延艸木上根紫赤色今所在有八月採
根陳藏器云周禮庾氏掌除蠱毒以嘉艸攻之嘉艸藁
荷與茜主蠱爲最○陸疏云齊人謂之茜徐州人謂之
牛蔓○周禮掌染艸掌以春秋歛染艸之物○貨殖傳
云千畝梔茜其人與千戶侯等

阪

爾雅云可食者曰原陂者曰阪下者曰溼邢氏云陂陀
不平而可食者名阪此三者雖有高下不平皆可種穀

給食也

子衿篇

青

爾雅青謂之蔥○考工記云畫繪之事雜五色東方謂之青青與白相次也赤與青謂之文黑與青謂之黻○釋名云青生也象物生時色也

衿

傳云青衿青領也○爾雅云衣皆謂之襟李巡曰衣皆

衣領之襟孫炎曰襟交領也○方言曰衿謂之交○釋名云襟禁也交于前所以禁禦風寒也○禮記云具大父母父母衣純以纁具父母衣純以青如孤子衣純以素○禮書云以纁備五采以爲樂也以青體少陽以致敬也以素存凶飾以致哀也

按青衿之衿本當作襟爾雅又有衿謂之衽衣小帶也士昏禮云施衿結帨釋名云衿亦禁也禁使不得解散皆謂衣小帶也然兩字亦通方言衿謂之交是

也

闕

疏云此謂城上別有高闕非宮闕也○釋名云闕在門兩旁中央闕然爲道也

揚之水篇

兄弟

朱子云兄弟婚姻之稱禮所謂不得嗣爲兄弟是也○周禮大司徒以本俗六安萬民其三曰聯兄弟鄭云兄

弟謂婚姻嫁娶○何休云圖安危可否兄弟之義

出其東門篇

縞

廣雅縞細繒也○禹貢云徐州厥貢玄纁縞○傳云縞衣白色

綦

顧命云四人綦弁鄭注云青黑曰綦馬本作騏亦云青黑色王肅云綦赤黑色○說文作緹云帛蒼艾色詩縞

衣緝巾未嫁女所服一曰不借○孔仲達云艾謂青而微白爲艾艸之色箋亦以綦爲青但綦是文章之色非染繪之色故云綦綦文

巾

說文云佩巾也从巾一象系也○方言云幪巾也大巾謂之帟嵩岳之南陳潁之間謂之帟亦謂之幪

按禮記左佩紛紛悅紛悅即巾也此巾宜爲佩巾或以爲婦人裹頭之中未詳典據然古者男子二十成人

士冠庶人巾蓋賤者之服漢元服幘王莽無髮乃施
巾古語云王莽禿幘施屋也至東漢魏晉更以巾爲
雅袁紹崔鈞之徒雖爲將帥皆著縑巾及有所謂綸
巾葛巾角巾者而女子喪冠亦謂之中幘諸葛武侯
以遺司馬宣王意者婦人裹頭者可通名巾與楊用
脩以巾幘爲女子未笄之冠又未知何據也注疏不
云無以明矣

闕

說文云城曲重門也○永嘉陳氏云門之外有副城回曲以障門者謂之闔

闔

說文云闔闔也○爾雅云闔謂之臺孫炎云積土如水渚所以望氣祥也○疏云闔是城上之臺謂當門臺也箋云闔讀如彼都人士之都謂國外曲城之中市里也

荼

箋云荼茅秀物之輕者飛行無常疏云釋艸有荼苦菜

又有茶委葉邶風誰謂荼苦即苦菜也周頌以薺荼蓼
即委葉也鄭於地官掌荼注及既夕注與此箋皆云茶
茅秀然則此言如茶乃是茅艸秀出之穗非彼二艸也
○爾雅云蘩荇茶薺蘼芳疏此辨芳茶之異名也茶茅
秀蘼也荇也其別名茶即茗也茗又一名薺又名蘼皆
荇茅之屬花秀名也○周禮掌荼掌以時聚茶以供喪
事○國語吳王萬人爲方陳白常白旂素甲白羽之矰
望之如茶韋昭云茶茅秀也

溱洧篇

蘭

傳云蘭蘭也○陸璣云蘭即蘭香艸也春秋傳曰刈蘭而卒楚辭云紉秋蘭孔子云蘭當爲王者香艸皆是也其莖葉似藥艸澤蘭廣而長節節中赤高四五尺漢諸池苑及許昌宮中皆種之可著粉中藏衣著書中可辟魚○本艸經云蘭艸主殺蠱毒辟不祥久服輕身不老一名水香生大吳池澤澤蘭生汝南諸大澤蜀本云

蘭艸葉似澤蘭尖長有歧花紅白色而香生下濕地圖
經云澤蘭與蘭艸相類但蘭艸生水旁葉光潤根小紫
五六月盛而澤蘭生水澤中及下濕地葉尖微有毛不
光潤方莖紫節七八月初採微辛此爲異耳○夏小正
云五月畜蘭爲沐浴也○易通卦驗云冬至廣莫風至
蘭始生○盛弘之荊州記云都梁縣有小山山上水極
淺其中悉生蘭艸綠葉紫莖芳風藻谷俗謂蘭爲都梁
即以號縣云○陳藏器云蘭艸婦人和油澤頭故曰蘭

澤○劉次莊樂府集云離騷曰紉秋蘭以爲佩又云秋
蘭兮青青綠葉兮紫莖今沅澧所生花在春則黃在秋
則紫然而春黃不若秋紫之芬馥也

按孔子云芝蘭生于深林不以無人而不芳曰生深
林則與此在水上者異矣毛氏謂蘭即蘭羅氏即以
本艸經之蘭艸當之但陸璣疏與本艸圖經所說蘭
形狀互異羅氏之言曰蘭艸一名都梁香一名水香
以解秉簡可也何關蘭乎蘭葉如莎首春則茁其芽

出五六寸杪作一花花甚芳香大抵生深林中林愈
深則莖愈紫故稱幽蘭與蕙甚相類其一幹一花而
香有餘者蘭一幹五六花而香不足者蕙江南蘭只
在春芳荆楚及閩中者秋復再芳故有春蘭秋蘭以
時驗推之羅氏說蘭近得其實信乎非此閒也蘭艸
澤蘭自陶隱居蘇恭已不能辨陳藏器始能別之而
衍義更有異論云蘭艸葉如門冬而濶且韌長一二
尺四時常青花黃中間葉上有細紫點春芳者爲春

蘭色深秋芳者爲秋蘭色淡秋蘭稍難得今江陵鼎
澧州山谷有之山外平田即無生于幽谷蓋可驗矣
其葉殊不與澤蘭相似澤蘭纔出土便分枝梗葉如
菊而尖長若取香臭則稍類耳若然則蘭艸亦出山
林且不似澤蘭矣然經明云生大吳川澤衍義所指
之蘭即羅願云生深林者而非經之蘭也蘭之種類
至多其入藥者更有馬蘭山蘭花可玩者有崇蘭鳳
尾蘭竹蘭石蘭鄭漁仲云蘭即蕙蕙即薰薰即零陵

香且不辨蘭蕙之種矣韓詩傳云三月桃花水下之時執蘭祓除薛君注鄭國之俗三月上巳之溱洧兩水之上招魂續魂秉蘭艸祓除不祥故詩人願與所悅者俱往也本艸經謂蘭艸可辟不祥故執以祓除抑或以蘭有國香人所服媚淮南子曰男子樹蘭美而不芳說者以爲蘭女類故左傳稱女爲季蘭宜女子樹之鄭女故執之以媚其士與祓除之禮說者參差蔡邕以爲因暮春天子乘舟禊于名川論語云浴

乎沂自上及下古有此禮後漢書以爲上巳官民皆
聚于東流水上陽氣布暢始洗滌之南齊志以爲三
月清明之節脩事水側禱祀以祈豐年予謂周禮女
巫掌歲時祓除釁滌則祓除之來已久第不知何緣
定于上巳之辰晉束廣微云周公成洛邑因流水以
汎酒逸詩曰羽觴隨流波此三月曲水之始也其說
無稽所引詩復不似周人之語摯虞謂起于徐肇三
女亾一邨盥洗者抑又妄矣

芍藥

廣雅云攣夷芍藥也○韓詩云離艸也言將離別贈此艸也○本艸云一名白木一名餘容一名犁食一名解倉一名鉗生中岳川谷及丘陵圖經云春生紅芽作叢莖上三枝五葉似牡丹而狹長高一二尺夏開花有紅白紫數種子似牡丹而小秋時採根根亦有赤白二色○古今注云芍藥有二種有艸芍藥木芍藥木者花大而色深俗呼爲牡丹非也又牛亨問曰將離別相贈以

芍藥者何答曰芍藥一名可離故將別以贈之亦猶相
招召贈文無文無一名當歸也○山海經云條谷之艸
多芍藥洞庭之上多芍藥○范子曰芍藥出三輔○建
寧記曰建寧出芍藥極精好○埤雅云芍藥榮于仲春
華于孟夏傳曰驚蟄節後二十有五日芍藥榮是也華
有至千葉者今羣芳中牡丹品第一芍藥品第二○雅
翼云芍藥花之盛者其根可和五臟制食毒古有芍藥
之醬合蘭桂五味以助諸食因呼五味之和爲芍藥○

花木攷云芍藥花譜總別四十二種其色以黃者爲貴
按芍藥即今芍藥也毛氏云香艸陸疏云今藥艸芍
藥無香非是也未審今何艸蓋泥毛公香艸之言必
欲求香于柯葉置其華而不論耳董氏則以古今注
謂芍藥可離唐本艸云可離江離而別以芍藥爲江
離矣

六家詩名物疏卷二十一